

Kolosi

Nəkwəkwə yame Pol rimirai ramvən kimi niməhuak apa Kolosi

Nəgkiarien kwəkwə kape Nəkwəkwə e Kolosi

?Pa rimirai nəkwəkwə e? Aposol Pol rimirai nəkwəkwə e.

?Rimirai ramvən kimi nipa? Rimirai ramvən kimi niməhuak apa Kolosi, taon ehuə kirik apa tanə ehuə e Tarki.

?Nimraghien rimnhawor pən iran minə ye nipig rimirai? Pol rapəh nivən-hanəyen ye niməhuak apa Kolosi; in rimnərig əmə nəvsaoyen kin. Ye nipig a, nəmhajoun eikuə tiksin kimnhavən apa niməhuak, mamhani mhamə kwənhavəh nirkunien kirik yame ramerkwaig tuk yermamə. Mamhani mhamə tukaməkeikei kəri-pən swatuk kape nəviginien mine ninimien, kini tukaməkeikei kəhuak kimi agelo minə, meinai pəh nien mə Yesu in yerpig pik. Mhamə nirkunien kape yermamə in nar ehuə.

?Rimirai nəkwəkwə e tuk naha? Pol rimirai nəkwəkwə e mə tukruh nhajounien eikuə yamə mine kasarə iran ye niməhuak apa Kolosi. Morkeikei mə tukrini-ərhav mə Kristo In yerpig rapita narimnar mifam, kini pəh nəməhuak minə tukhapəh nisəterigien kin nhajounien eikuə minə a, meinai kaseikuə.

Pol rimirikakun kafan nəgkiarien

1 ¹Yo Pol, Kughen rimirpen-ta yo mə yo aposol kirik kape Yesu Kristo. Kimru piautawə Timoti ²kimru yakarərai mwher-pre kin kimi əmiə narmamə kape Kughen apa Kolosi. Kimiə e piak minə mine nowinik minə ye Kristo yame nakshatətə timtim iran. Kimru yakawəhuak mə nihuvəyen mine nəmərinuyen kape Rimtawə Kughen In tukraməkeikei marə yerkimiə.

Pol ramni vi vi Kughen tuk nāmә Kolosi

³Nipig yakasәhuak tuk әmiә kimi Kughen e rim Yesu Kristo Yermaru kapәtawә, nipig mifam yakamhani vi vi In tuk kafan wok ye nimraghien kapәmiә, ⁴meinai yimәsәrig mә kapәmiә nhatәtәyen ramskai tuk Yesu Kristo, mine norkeikeiyen kapәmiә ramvәn tuk narmamә kape Kughen minә.^a ⁵Nhatәtәyen mine norkeikeiyen kapәmiә ror mәkneikin meinai nakharkun huvә mә Kughen tukrivәhsi-pre naha nhagin kimi әmiә yame In rimnor apnәpeinә-ta iran apa ye rao ye neai. Nakwәsәrig ta narimnar minә e ye nәgkiarien әfrakis, in e nәvsaoyen huvә kape Yesu Kristo. ⁶Ikin minә ye tanimtanә mi-fam, nәvsaoyen huvә e ramuә mamor kwәnkwan mamor vi nimraghien kape narmamә.^b Kini nәvsaoyen huvә e rinor mәknakin ye nimraghien kapәmiә ririkakun ye nipig yame kimiә nimisәrig nәgkiarien әfrakis kape nihuvәyen kape Kughen mharkun. ⁷In e kwәn e Epafras ruini ta nәgkiarien e tuk әmiә. In yermamә huvә kirik yame ravәh nәgkiarien kapәmru, mamәrer timtim tuk norien wok kape Kristo kini mamasitu min irәmiә. ⁸In mәvsao-pә kimi әmru kin norkeikeiyen kapәmiә yame Nanmin kape Kughen rivәhsi-pre kimi әmiә.^c

⁹Ror mәkneikin mә ririkakun ye nipig kimawә yimisәrig nәvsaoyen kin әmiә, yaksәhuak ye nipig mifam tuk әmiә. Misaiyoh Kughen mә Nanmin kafan tukrikwar irәmiә, nakharkun rikin, mivәhsi-pre min nirkunien ehuә kimi әmiә.^d ¹⁰Yakasәhuak mәkneikin mә kimiә takharkun nisaiyen Yermaru kapәtawә ye nimraghien kapәmiә, pәh rikin tukragien tukun. Mә nimraghien kapәmiә tukraurә mamor kwәnkwan rhuvә tuk wok m-fam kape Kughen yamә mine nakasor. Kini pәh Kughen tukrasitu irәmiә mә takharkun huvә min In. ¹¹Yakasәhuak mә nәsaninien ehuә kape Kughen tukror әmiә naksәusik-әusik ye nipig nahasien ramuә tuk әmiә. Pәh taksәrer tim tim, kini nәrigien kapәmiә tukrәpomh, kini pәh rikimiә tukramagien әmә,^e ¹²kini pәh takamhani vi vi Kughen Rimtawә meinai In rimnor әmiә naksatuatuk mә takharkun nisarәyen ye rao ye neai, aikin ramraan ghan әmә ikin, kimiә mine kwajikovә minә fam kape Kughen, iriә e narmamә kape Kughen minә.^f ¹³Kughen rimnor mәknakin ye nipig rimirәhsi-ta әtawә ye narmaruyen kape Setan yame ramarә ye nәpignapien mivәhsi-pә әtawә ye narmaruyen kape Tini keikei^g ¹⁴yame rimnarpin nimraghien kapәtawә, kini mirisin әtawә ye narpinien kape tәvhagә hah.^h

Yesu Kristo In yerpirig rapita narimnar m-fam

¹⁵Ji Kughen yame narmamә kimisәm, In rәmhen әmә kin Rimni yame kitawә khapәh nisәmien.

^a 1:3-4 Efes 1:15-16 ^b 1:5-6 Efes 1:13; 1 Pita 1:4 ^c 1:7-8 Kol 4:12; Flm 23

^d 1:9 Efes 1:16-17 ^e 1:11 Efes 1:19; 3:16 ^f 1:12 Efes 1:11,18 ^g 1:13 Luk 22:53; Efes 2:2

^h 1:14 Efes 1:7

Kupən kupən əgkəp, nipig nimoptanə mine neai mine narimnar
fam kimnamharkək hanə, mərig Tini, In rinarə rerin ta. Ror
məkneikin mə In nirmın nupan ye narimnar minə fam.ⁱ

16 In yerpırig meinai In rimnor narimnar m-fam ye tanımtanə, mine
neai, narimnar yame kaməm əriə mine yamə mine kipəh nəmien
əriə, iriə e agelo minə, mine yarmhə minə, mine nanmın has
minə, mine yermaru minə fam.

In rimnor narimnar fam; kini narimnar fam, kafan əmə.

17 Kwasig ikin narimnar m-fam ramswın, kini In rinarə rerin ta.^j
Narimnar mifam ramswın meinai In raməpkəfugin əriə.

18 Kini In əmə ramərer əkupən ye niməhuak. In kapən kapə niməhuak.
Kini nəməhuak minə, iriə nıpran.

In nuknei niməhuak. In e, In yermamə yame rimnəkupən
mımragh min ye nimhəyen kafan mamarə rerin.

Ror məkneikin mə In yerpırig ye narimnar m-fam.^k

19 Meinai Kughen rıgın ragien pik mə nımraghien mine nəsaninien
m-fam kafan ramswın min ye Kristo,^l

20 mə tukrərəhu-pə nəmərinuyen ye nipig nıtaw Kristo rimnaiyu ye
nai kamarkwao kin. Kini narmamə, mine nar mıragh minə, mine
agelo minə, mine narimnar fam kwənharerig-pə fam min ye
kwermın.^m

21 In apa kupən, kimiə nimisərer isok tuk Kughen. Nərigien mine
norien kapəmiə rahas pik, naksor tikmir kimiə Kughen.ⁿ 22 Mərig
taktəkun ai, Kughen rimnor əmiə nakwənhauə misor kirikianə kimiə
min ye nimhəyen kape Kristo yame nıpran rimnəker ye nai kamarkwao
kin. Kughen rimnor məkneikin mə tukrivəh əmiə nakhauə ipakə tukun,
naksatuatuk ye nımrın, norien has kapəmiə rirkək, kini nar has kirik
rirkək irəmiə yame to Kughen rini-hah əmiə tukun.^o 23 Narimnar minə
e tukror məkneikin tukmə naksarer tim tim ye kapəmiə nhatətəyen
ye Yesu. Nımisərig nəvsaoyen huvə yame ramhajoun narimnar yame
Kughen tukror kimi əmiə apa ye rao ye neai, kini kapəmiə nətərigien
tukraməkeikei marer timtim ye narimnar minə e. Nəvsaoyen huvə
e, yame nakwəsərig ta, kamhani-ərhav ikin minə ye tanımtanə. Kini
Kughen rimnokrən kin yo, Pol, mə jakni-ərhav min.

Pol in ramasitu ye niməhuak

24 Rikik ragien mə yakərig nəmhəyen ye nıprak tuk nasituyen irəmiə.
Kristo rimnərig nəmhəyen ye nıpran mə niməhuak tukrurə. Kini ye
swatuk kirikianə əmə min, yo min yakərig nəmhəyen ye nıprak tuk

ⁱ 1:15 Jon 1:18; 2 Kor 4:4 ^j 1:17 Jon 1:1; 8:58 ^k 1:18 Wok 26:23; Efes 1:22-23; Rev 1:5

^l 1:19 Kol 2:9 ^m 1:20 Efes 1:10 ⁿ 1:21 Rom 5:10; Efes 2:12 ^o 1:22 Rom 5:10; Efes 5:27

Kristo, in e niməhuak, mə tukrurə miskai. ²⁵Kughen əmə rīvəhsi-haktə yo mə jakor wok ye niməhuak kafan. Kini taktəkun ai, yakirkun nasituyen irəmiə tuk wok yame Kughen rimnərhə-pə ye kwermik. Kafak e wok mə jakamni-ərhav nəgkiarien m-fam kape Kughen pəh nakharkun huvə ²⁶nərig-məniwən-ien kape Kughen yame rinamerkwaig tuk kaha minə mine rao minə kupən. Mərig taktəkun ai In rimnhoprai nipran kimi kafan narmamə minə.^p ²⁷Kughen rimə tukrhajoun narmamə mifam mə nəgkiarien kafan ramni mə In tukrivəhsi-pən nihuvəyen ripsaah kimi əmiə narmamə yamə mine pəh nien mə kwənərəus kape Isrel. Nəgkiarien kafan ramni mə Kristo ramarə yerkimia, in e nakharkun niniyen nəfrakisien mə takhavəh nimraghien rerin.

²⁸Kini kitawə kamhani-ərhav Kristo kimi narmamə m-fam. Masəvhag kimi əriə, mamhasig ihaktə rikiriə ye nirkunien fam kapətawə, mə narmamə minə fam tukhauə ye nimri Kughen, masofugin-pən ye Kristo, mhaure misəhuə ye nhatətəyen kapəriə. ²⁹Yakamarkut pik tuk nar e, kini nipig m-fam yakamor wok ye nəsaninien ehua kape Kristo yame ravəhsi-pə kimi yo.^q

Tukasəkeikei mishatətə tim tim ye Yesu

2 ¹Yakorkeikei mə takharkun mə yakaməmnhawk pik tuk əmiə nəmə Kolosi, mine nəmə Laodisia, minə nəməhuak minə tiksın yamə mine yakpəh hanə nəmien əriə. ²Yakor məkneikin wok tuk nivəhsi-haktəyen nərigien kapəmiə m-fam, nipig kimia nakamharpin huvə rikimia mə rikimia tukror kirikianə əmə, kini narimnar minə e in ramuə nipig naksorkeikei əmiə minə. Kini yakamarkut mə kimia m-fam takhavəh nirkunien huvə yame tukror rikimia rəsanin, kini mor min mə nakharkun huvə nəgkiarien əfrakis kape Kughen yame rimnerkwaig kupən, mərig taktəkun ai, ruatərhav. Kini nətərig-məniwən-ien e, in e Kristo ³yame Kughen rimnəwhai kəji nirkunien m-fam kasəmir iran.^r ⁴Yakaməgkiar məkneikin mə yermamə kirik rirkək mə to ri-vita nərigien kapəmiə kin nəgkiarien heikən kafan.^s

⁵Ror mə yakamarə pawk isok tuk əmiə, mərig rikik raməsik pik əmiə. Kini rikik ragien pik meinai yimnərig mə kapəmiə nətərigien kirikianə əmə, kini kimia nakashatətə tim tim əmə ye Kristo.^t

Kapətawə nimraghien tukraməkeikei maməmir tim tim əmə ye Yesu Kristo

⁶Mərig in ai kimia nakwənhavəh Yesu Kristo mə In Yermaru kapəmiə, takasəkeikei masofugin-pən iran nipig mifam. ⁷Takharəh tim tim

^p 1:25-26 Rom 16:25-26; Efes 3:2-9 ^q 1:29 Efes 3:7,20; Fil 4:13 ^r 2:3 1 Kor 1:24,30

^s 2:4 Rom 16:18 ^t 2:5 1 Kor 5:3

Kristo rəmhen kin nuai nai yame rameiwaiyu mamrəh kapier. Kini pəh nimraghien kapəmiə rurə məusik-əusik pən iran ramhen əmə kin yame kinhajoun ta əmiə kin. Kini pəh nagienien tukrikwar yerkimia marh-yerhav tuk naha nhagin yame Kughen rimnor irəmiə.^u

⁸Taksərig əmiə mə narmamə tukhapəh nhavi-ta-yen əmiə kin nhajoun-ətəwaoyen kapəriə, yame nipran rirkək. Nhajoun eikuəyen e kamhasi-pən əmə tuk nərigien kape kaha minə, mine kape tokrei tanə əmə, mhapəh nisəri-pənien nərigien kape Kristo.

⁹Kughen raməmir piəpiə ye niprai kwən e Yesu Kristo.^v ¹⁰Kini Kughen In rivəhsi-pre nihuvəyen kape Kristo rukwar ye nimraghien kapəmiə. Kristo e In e ramarmaru ye agelo minə, mine yarmhə minə, mine nanmin has minə, mine yermaru minə fam.^w ^x ¹¹In rimnəsik-pən əmiə. Mərig pəh nien mə rimivəh nao kimi əmiə, mərig rimivəhsi-ta rikimie yame ramor təvhagə hah, məspir-pən yame rhuvə.^y ¹²Kini ye nipig yame kimnakatənim kin əmiə ye nu, ramor nimtətien mə nimraghien akwas kape təvhagə hah kapəmiə rimamhə, kini kiminim əmiə rəmhen kin in ai kiminim Yesu, kini Kughen rimnor əmiə nakhamragh min ye nimraghien wi. In e nhatətəyen kapəmiə ye nəsaninien ehuə kape Kughen yame rimnor Yesu rimimragh min ye nimhəyen kafan.^z ¹³Apa kupən, nipig Kughen ripəh hanə nivəhsi-tayen norien hah minə yerkimie, rəmhen kin nakwənhamhə ta tuk norien has minə kapəmiə. Mərig nipig nimnhauə kisor kirikianə kitawə Yesu, kini Kughen rimivəh miragh ətawə. Mirisin ətawə tuk narpinien kape norien has minə fam kapətawə.^a ¹⁴In rimnor loa kupən kafan ruə mə in nar apnapig, mine natuakəmien minə iran, yamə mine kamhauh ətawə mamharuk-pən nəgkiarien has irətawə tuk nəsikien natuakəmien minə kafan. Loa kupən kafan nəsaninien rirkək rəmhen kin in ai rimnəsik pən ye nai kamarkwao kin iriu Yesu.^b ¹⁵Kimnəsik-pən Yesu ye nai kamarkwao kin, In rinapita nəsaninien kape yarmhə minə, mine nanmin has minə, mine yermaru minə fam. Kristo rinapita ta əriə, mamor-pən kimi əriə rəmhen kin yame king ramor-pən kimi tikmir minə kafan yame rinapita əriə, mofugin əriə ye nimri jir, markis-arkis əriə.^c

Yesu ramarmaru irəmiə

¹⁶Ror məkneikin mə takhapəh nisətərigien kin narmamə yamə mine kasərəhu natuakəmien minə mamhani-əhu əmiə mə takhasiai

^u 2:7 Efes 3:17 ^v 2:9 Jon 1:14,16 ^w 2:10 Efes 1:21-22 ^x 2:10 Emru Kol 1:16. Ye nəgkiarien kape nəmə Gris, rapəh niniyen nhagriə, mamni əmə “Kristo ramarmaru ye narimnar fam yamə mine kamhawəh neihuəyen,” mərig nipran e agelo minə, mine yarmhə minə, minə nanmin has minə, mine yermaru minə fam. ^y 2:11 Rom 2:29
^z 2:12 Rom 6:4 ^a 2:13 Efes 2:1,4-5 ^b 2:14 Efes 2:14-16; 1 Pita 2:24 ^c 2:15 2 Kor 2:14

nəviginién kirik, uə ninién kirik, uə nipiɡ rhakə kirik, uə makua rhakə kirik, uə Sabat.^d ¹⁷Natuakəmien minə a kashajoun pən nar kirik yame tukripiuə, mərig nīpran e Yesu Kristo.^e ¹⁸Narmamə tiksin kasausit pik mhamə kasəmrərhav masəm nīprai nar. Mərig nərigien kapəriə in kape yermamə əmə, nīpran rirkək. Iriə kamhasigəvin əmə mə nərigien kapəriə rameiwaiyu atuk əmə tuk əriə. Mərig nəfrakisien mə kasausit pik. Kini mishajoun mə tukaməkeikei kəhuak kimi agelo minə. Mərig takhapəh nisəri-pənién norien kapəriə, tamə naksəpkərhav ye nīmraghien kapəriə. ¹⁹Narmamə minə a khapəh nharaptərək-in-tim-timien Yesu. Mərig Yesu ramhen əmə kin kapən kapə nīməhuak, kini nīməhuak in nīprai Yesu. Rəmhen kin nīprai yermamə yame rirpin ikin ye kwənərəus minə ramvən ye nikəkrin, kini Yesu tukror məkneikin ye nīməhuak kafan mə nīməhuak tukriskai, kini murə mamehuə ye nīmraghien huvə yame Kughen ramor raurə.^f

Kitawə kimnhavəh nīmraghien vi meinai kimisor kirikianə ye Yesu

²⁰Nipiɡ nimishatətə ye Yesu, rəmhen mə kimiə min nimnhamhə. Kini natuakəmien to rīpəh nivənién tuk narmamə yamə minə kwənhamhə. Kini nuknei loa yamə mine kasəɡkiar kin narimnar kape tokrei tanə əmə, nəsaninién kapəriə rirkək, to khapəh nisarmaruyen irəmiə. Ror məkneikin yakamaiyoh əmiə mə, ?Rhawor e nakasəri-pən hanə natuakəmien mine kape tokrei tanə? In e nəɡkiarién yamə mine kamhani mhamə, ²¹“Takhapəh ni-rapién nar e,” uə, “Takhapəh nisənién nar e,” uə, “Takhapəh nharəhyen nar e.”^g ²²Mərig natuakəmien minə e kamhasi-pən əmə tuk nəɡkiarién kape yermamə. Kasəɡkiar əmə kin narimnar kape tokrei tanə. Mərig narimnar yamə mine kasatuakəm tukun to khapəh nisoriahyen rikimiə, meinai tukmə nakvəh, mən, kini rirkək min.^h ²³Yakirkun mə nipiɡ nakwəsərig nhajounien kapəriə, nakhamə-ta mə nəɡkiarién ehua e; mhamə ta mə taksor nəkwairiə. Mərig kamhasigəvin mə kasorkeikei pik Kughen, mamhasigəvin min mə nərigien kapəriə rameiwaiyu atuk əmə tuk əriə, mhamə kasarha huvə tuk nīmraghien kapəriə. Mərig nəfrakisien mə natuakəmien minə kapəriə khapəh nisasitu-əkgəp-ién irətawə mə nīmraghien kapətawə tukratuatuk.

Narəyen atuatuk

3 ¹Mərig in ai Kughen rīmivəh mīragh əmiə min Kristo, kini ror məkneikin mə taktəkun ai, kimiə takasəkeikei misor rikimiə tukrivən əmə tuk narimnar kape rao ye neai, ikin Yesu ramkwətə ikin ye nīkar Kughen matuk.ⁱ ²Takasəkeikei misor rikimiə tukraməsik əmə

^d 2:16 Rom 14:1-13 ^e 2:17 Hib 8:5 ^f 2:19 Efes 2:21; 4:16 ^g 2:20-21 Gal 4:3,9; 1 Tim 4:3

^h 2:22 Mat 15:9 ⁱ 3:1 Mak 12:36; 16:19; Efes 1:20

narimnar kape rao ye neai, pəh rikimiə tukripəh nəsikien narimnar kape tokrei tanə. ³Meinai kimiə Kristo nakwənhəmha, kini nimraghien əfrakis kapəmiə ramerkwaig-pən tuk Kristo yame ramarə ye rao ye neai iriu Kughen.^j ⁴Nimraghien əfrakis kapəmiə, in əmə e Kristo əmə. Kini nipig Kristo tukripirerig-pə min, kini Kughen tukrhajoun ətawə Kristo kimi narmamə m-fam. Iriə tuksəm nikhakien kafan.

⁵Ror məkneikin mə takasəkeikei misəpəh əgkəp norien has minə kape tokrei tanə rəmhen kin: nipiraovin mine narman minə kamhakir apis apis əriə minə; uə kasor norien rahas ror naurisien tuk niniyen; uə kasorkeikei pik əriə minə tuk norien has; uə təvhagə has rehəuə pik ye nətərigien kapəriə; uə kasəptig kin nar. Narmamə yamə mine kasəptig kin nar kisəmhen kin narmamə yamə mine kasəhuak kimi nanmi nar minə. Kapəriə kughen e nautə kapəriə.^k ⁶Kasor norien has minə e, niemhaa rhai Kughen tukun, In tukror narpinien ehəuə kimi narmamə yamə mine kasor narimnar minə a.^l ⁷In apa kupən, ye nimraghien kapəmiə, nimseriwək əmə ye narimnar minə a. ⁸Mərig taktəkun ai, takasəkeikei mhavəhsi-ta narimnar mine ye nimraghien kapəmiə, mhapəh nisorien narimnar minə e: takhapəh nisorien niemhaa, tikinhermiə tukripəh nhopsir-hopsirien rəmhen kin karuəruə ramahirəg-rəg; mhapəh nhaniyen nikar jir; mhapəh nisarpakwaiyen; mhapəh nisor-has-pən-ien kimi narmamə.^m ⁹Taksəpəh niseikuəyen irəmiə minə, mərig in ai kimiə nimisəpəkiək-ta kin nərigien əkwəs kapəmiə, misəpəh kafan norien minə,ⁿ ¹⁰misarar miseriwək ye nətərigien vi. Kughen rimivəh-sipre nimraghien wi kimi əmiə, mor əmiə mə takhauə masor əmə rəmhen kin In, mor əmiə nakharkun huvə In.^o ¹¹Kughen rimivəh-sipre nimraghien vi kimi əmiə, in nar apnapig mə ik yemə Isrel kirik, uə pəh nien mə ik yemə Isrel, uə kinəsəg-pən ta ik, uə kipəh nəsig-pənien ik, uə nimnor skul, uə nakpəh nor-huvəyen skul, uə ik yorwok əmə kirik, uə ik yermaru kirik. Mərig nar ehəuə e in e Kristo, kini In ramarə min ye nimraghien kapətawə m-fam.^p

¹²Kimiə narmamə kape Kughen minə, In rorkeikei əmiə, mərəhu karin əmiə mə kafan. Kini ror məkneikin, taksarkaoh kin neipən huvə kape Kughen, in e: rikimiə tukraməkeikei mehuə tuk narmamə; masor huvə pən kimi narmamə; nətərigien kapəmiə tukreiwaiyu yetanə; kimiə nəmə mar minə; kini nətərigien kapəmiə tukrapomh.^q ¹³Nipig yermamə kirik ramor nar kirik rapəh nəmhenien ye nimrimə, kini rikimiə tukripəh nəmhə-aihuua-yen tukun. Kini tukmə yermamə kirik ramor ahas pən kimi kimiə kirik, pəh in tukrivəh əmə rimhə pən yerkin. Mərig in tukraməkeikei mərə-kin, kini in mor huvə pən kimi yermamə a. Takhapəh nharaptərekin-

^j 3:3 Mat 6:33 ^k 3:5 Efes 5:5 ^l 3:5-6 Rom 6:6,11; Efes 4:19; 5:3-6 ^m 3:8 Efes 4:25-29; 5:4 ⁿ 3:9 Efes 4:22,25 ^o 3:10 Efes 4:24 ^p 3:11 Gal 3:28 ^q 3:12 1 Pita 2:9

tim-tim-ien norien hah yame yermamə ramor kimi əmiə yerkimia, mərig sor huvə-pən kimin, rəmhen əmə kin yame Yermaru kapətawə rapəh niraptərəkkin-tim-timien norien has kapətawə yerkin, kini mor huvə-pə əmə kimi ətawə.^r ¹⁴Nar keikei yame takasəkeikei masor, taksarkaoh kin neipən huvə e kape Kughen, in e norkeikeiyen. Naksorkeikei əmiə minə mamhavən, ror əmiə nakamhauə kirikianə.^s ¹⁵Havəh nəmərinuyen kape Kristo pəh In tukramarmaru yerkimia, meinai Kughen rimnokrən kin əmiə mə takhauə misor kirikianə, naksarə əmə ye nəmərinuyen. Kini nipig m-fam, takamhani vi vi Kughen tuk narimnar yame In ramor kimi əmiə.^t

¹⁶Shajoun əmiə minə kin nəgkiarien kape Kristo, kini takhavəh-si haktə nərigien minə kapəmia. Takasəkeikei misəni nipe minə ye Nəkwəkwə e kamni kimə “Ol Sam,” mine nipe əhuak minə, mine nipe yamə mine kamhasi-pən tuk Nanmin kape Kughen. Taksəni fam əgkəp əriə mamhani vi vi Kughen yerkimia. Kini ye norien kirikianə əmə min, pəh nəgkiarien kape Kristo tukraməmır mamragh maurə huvə yerkimia ye nipig mifam.^u ¹⁷Narimnar yame nakasor, mine nəgkiarien m-fam yamə mine nakamhani, taksor əmə ye nhag Yermaru Yesu. Kini nipig mifam taksəhuak kimi Yesu mhani vi vi Kughen Rimtawə.^v

Norien vi kape tatə, mine mamə, mine kwajikovə minə, mine slef minə

¹⁸Nipiraovin, taksor nəkwai narman minə kapəmia. Norien e ratuatuk tuk nipian əhuak minə mə taksor.^w

¹⁹Narman, takasorkeikei nipiraovin minə kapəmia, mhapəh nisərik-mitə-yen əriə.^x

²⁰Kwajikovə minə, taksor nəkwai rimimia mine nisinmia, meinai Yermaru kapətawə, rikin tukragien tukun.^y

²¹Kimia tatə minə, takhapəh nisorien narpinien yame rapita nərigien yame kwajikovə minə kasor mə rikiriə tukrəmhə tukun. Tamə naksor-pən məknakin kimi əriə, nərigien kapəriə rimir.^z

²²Slef minə, kapəmia aikin namehuə minə kape tokrei tanə e, kini ye nipig minə fam, takasəkeikei misor nəkwairiə. Pəh nien mə nipig əmə kasarha tuk əmiə mə rikiriə tukragien tuk əmiə. Mərig in ai kimia nakhasiai Yermaru kapətawə, takasəkeikei misor wok əfrakis yerkimia.^a

²³Naha nhagin wok yame nakasor, taksor yerkimia m-fam. Pəh nien mə yermamə əmə yame ramehuə irəmia mərig Yermaru kapətawə In ramehuə irəmia. ²⁴Mərig takasəkeikei mharkun mə Yermaru kapətawə In tukrarpin tai wok kapəmia. In ai nərokien yame Kughen rimirpen ta mə tukrivəhsi-pən kimi tini minə.

^r 3:13 Efes 4:2,32 ^s 3:14 Rom 13:8-10 ^t 3:15 1 Kor 12:27; Efes 4:4; Fil 4:7

^u 3:16 Efes 5:19 ^v 3:17 1 Kor 10:31; Efes 5:20 ^w 3:18 Efes 5:22 ^x 3:19 Efes 5:25

^y 3:20 Efes 6:1 ^z 3:21 Efes 6:4 ^a 3:22 Efes 6:5-8

Nakharkun mə yermamə e yame naksor atuə kin kafan, in e Kristo Yermaru. ²⁵Kini mərig narmamə yamə mine kasor norien hah, Kughen tukrarpin tai norien hah kapəriə. In ramor raməm nəmhen kimi narmamə mifam.^b

4 ¹Nəmehuə yamə mine kapəmiə aikin slef minə, takasəkeikei misor rhuvə matuatuk pən tuk əriə. Taksor rəm-nəmhen pən tuk əriə. Takasəkeikei mharkun min mə kapəmiə min kirik aikin Yemasur, In ramarə apa ye rao ye neai.^c

Pol raməvhag kimi əriə

²Pəh takhapəh nisəpəhyen nəhuakien kimi Kughen, misərig əmiə, mhani vi vi In.^d ³Kini yakorkeikei mə kimiə taksəhuak min tuk əmawə, mə Kughen tukrəhitə ye swatuk mə jakhani-ərhav nərig-məniwəniən kape Kughen. In e Kristo. Yakamni-ərhav nəgkiarien e, kimivəhsi-pən yo ye kalabus, kirkwəji yo kin jen tukun.^e ⁴Taksəhuak mə jakamni-ərhav nəgkiarien e tukratuatuk mihuvə rəmhen əmə kin yame jakaməkeikei mamor.

⁵Kimiə nəməhuak minə, pəh narmamə yamə mine khapəh nisəhuakien kisəm-pən Yesu ye norien minə kapəmiə. Kini ye nīpig mifam, takasəkeikei masərig əmiə mə nīmraghien kapəmiə tukrivi narmamə iruə khauə tuk Yesu.^f ⁶Kimiə takasəkeikei masəgkiar huvə kimi əriə ye nəgkiarien e yame rhuvə mheikin, pəh iriə tuksərig nəgkiarien minə e mə khahuvə. Kini tukmə narmamə kasaiyoh əmiə kin nhatətəyən kapəmiə, rhuvə mə takharkun nhoprai-pəniən kimi əriə m-fam.^g

Pol rher-pən kin yermamə mir kīraru kīravən apa Kolosi

⁷⁻⁸Yakamher-pən kin piautawə keikei Tikikas. Nīpig mifam in ramərer matuk tuk nasituyen irak tuk wok kape Yermaru. In raurə tuk əmiə tuk nərigien kīraru əmə. Mə in tukrəvsao kimi əmiə kin norien yame yakasarə iran ai taktəkun. Kini mə tukror rikimiə ramragh.^h ⁹In raurə iriū piautawə keikei Onesimas. Nīpig mifam in ramhatətə tim tim ye Yesu. In kimiə kirik. Iriū tukwəvsao kin narimnar fam ye narəyən eikin e.ⁱ

Nəgkiarien infamien

¹⁰Kivəhsi-pən kwən e Aristakas ye kalabus kimru min. In ramni-pre huvə tuk əmiə. Kini Mak, naorahi Banabas, in min ramher-pre kin nəgkiarien huvə kafan kimi əmiə. Kini kimiə nakwənhavəh ta nəgkiarien tukun. Tukmə rurə en kimiə ikin, nakhakir mhavən misarha huvə

^b 3:25 Rom 2:11 ^c 4:1 Efes 6:9 ^d 4:2 Efes 6:18; Fil 4:6 ^e 4:3 Rom 15:30; Efes 6:19

^f 4:5 Efes 5:15-16 ^g 4:6 Efes 4:29; 1 Pita 3:15 ^h 4:7-8 Efes 6:21-22 ⁱ 4:9 Flm 10-12

tukun.^j ¹¹ Kini Josua Jastas, in min ramher-pre kin nægkiarien huvə kafan kimi əmiə. Ye kwənərəus kape nəmə Isrel, yamə mine kashatətə ye Yesu, kwərə misir a, irisir kirhasitu irak tuk wok kape rao ye neai. Kini kwərə misir a, irisir kirhasitu pik irak ye nipig əutən yame ramuə ye nimraghien kafak.

¹² Kwən e Epafra in kimiə min kirik. In rher-pre min kin nægkiarien huvə kimi əmiə. In yermamə kirik yame nipig m-fam ramor wok kape Yesu Kristo, kini ye nipig mifam, in raməhuak tim tim tuk əmiə. Kini in raiyoh Kughen mə kimiə taksərer timentim kini mhauə mharkun huvə narimnar fam yame Kughen rorkeikei. ¹³ Yakirkun nini-pre-yen kimi əmiə mə kwən e in ramarkut pik tuk nasituyen irəmiə, mine ye narmamə yamə mine kisarə apa taon mir e Laodisia mine Hierapolis. ¹⁴ Kwən e Demas, mine Dokta Luk, yame in kitawə keikei kirik, iriu min kawher-pre kin nægkiarien huvə kimi əmiə.^k

¹⁵ Yakamher-pre min kin kafak nægkiarien huvə kimi piautawə mine nowintawə apa kwənmhaan e Laodisia, mine pian a Nimfa, mine nəməhuak mifam yamə mine kasofugin aikin.

¹⁶ Taksəvheikin ta nəkwəkwə e yakamrai-pən mher-pre kin kimi əmiə, mishəpən kin kimi niməhuak apa Laodisia mə iriə min tuksəvheikin. Kini ye norien kirikianə min, kimiə takasəkeikei misəvheikin nəkwəkwə kape nəmə Laodisia.

¹⁷ Kini takasəkeikei mhani-pən tuk Akipas mə in tukraməkeikei mōr fam wok a yame Yermaru kapətawə rimivəhsi-pən kimin mə tukror.^l

¹⁸ Yo Pol, yakvəh pen mamrai nægkiarien e kin kwermik, mamni-pre rhuvə kimi əmiə. Pəh rikimiə tukraməsik mə kivəhsi-pən yo ye kalabus, kirkwəji yo kin jen. Pəh Kughen tukrasitu irəmiə kini mautə-pre kin kafan nihuvəyen raməmir tuk əmiə.^m

^j 4:10 Wok 12:12; 13:13; 15:37-39; 2 Tim 4:11 ^k 4:12-14 Kol 1:7; Flm 23-24 ^l 4:17 Flm 2
^m 4:18 1 Kor 16:21